

**SINDICATOS,
pola OFICIALIDÁ**



MANIFIESTU SINDICATOS POLA OFICIALIDÁ

Porque ye la hora d'acabar con una excepcionalidá constitucional que dura más de 40 años

Les centrales sindicales:

Colectivo de Trabajadores. (CT)

Comisiones Obreres d'Asturies. (CCOO)

Confederación Xeneral del Trabayu. (CGT Asturias)

Confederación Regional del Trabajo de Asturias y León. (CNT Asturias y León)

Corriente Sindical de Izquierda. (CSI)

Izquierda Sindical Asturiana. (ISA)

Red de la Clase Trabayadora. (RCT)

Sindicato Astur independiente. (SAi)

Sindicato Avanza.

Sindicato de Obreros Mineros de Asturias. (SOMA-FITAG-UGT)

Sindicato Unitario y Autónomo de Trabajadores de la Enseñanza de Asturias. (SUATEA)

Unión General de Trabajadoras y Trabajadores de Asturias. (UGT)

Unión Sindical Obrera de Asturies. (USO)

consideren que, llueu d'aprobase la Constitución Española (CE) en 1978 y l'Estatutu d'Autonomía d'Asturies (EAA) en 1981, ye insostenible que'l marcu normativu asturianu siga ensin recoyer la previsión constitucional del art. 3.2:

“Las demás lenguas españolas serán también oficiales en las respectivas Comunidades Autónomas de acuerdo con sus estatutos”



**SINDICATOS,
pola OFICIALIDÁ**



N'efectu, dempués de qu'en 1984 entamare la puesta en práctica d'una política llingüística de protección del nuesu patrimoniu llingüísticu (coincidiendo col aniciu de la escolarización del asturianu y del eonaviegu), vese que los sos llogros nun respunden a les expectatives y demandes sociales y qu'estes queden mui lloñe del desarrollu algamáu pola ciudadanía gallega, vasca, navarra, catalana, valenciana, balear y aranesa en rrellación col exerciciu de los sos derechos llingüísticos.

Ye más, nesos ámbitos territoriales la oficialidá de les respectives llingües foi afitando un desarrollu económicu venceyáu a potentes y modernes industries (editoriales, artístiques, audiovisuales, musicales, turístiques...) que xeneren riqueza, dinamismu social y puestos de trabayu d'alta cualificación y que, a lo cabero, representen, según los casos, ente'l 2.5 y el 3 % del PIB d'eses comunidaes.

Nun tien sentíu -y ye inconcebible en términos democráticos- que lo qu'a los otros territorios bilingües se-yos concedió cuantayá se-y niegue a Asturias. Por eso consideramos ineludible que, agora que s'abrió una nueva oportunidá na Xunta Xeneral, los partíos políticos s'apauten p'algamar l'alcuerdu definitivu qu'asegure un futuru digne y constitucional pa les llingües d'Asturies.

Nesti sen, los sindicatos firmantes d'esti manifiestu pidimos, con enerxía y rotunidá, que les fuerces polítiques parllamentaries nun dexen pasar esta oportunidá pa que, al marxe de les llexítimes diferencies ideolóxicques, se proceda a una reforma estatutaria que garantice l'usu oficial del asturianu y del eonaviegu, la llibertá nel emplegu llingüísticu y la non discriminación de los falantes y que seya, al empar, una fonte de desarrollu social, cultural y económicu pa tola ciudadanía asturiana.

Uviéu, 13 de marzu de 2025.